



**Meeqqat peqqissumik imaqarluartumillu inerikkiartornissaannut, atualernissamut piareersimanissaannut nalinginnaasumillu perorsarsimassusaannut iluaqutaasussamik nunatsinni meeqqanut suli atualinngitsunut perorsaanikkut inerikkiartuutaasumik ilaqutariit meerartallit nuna tamakkerlugu atuinissamut piarerfissaqalernissaat qanoq qulakkeerneqarsinnaanersoq pillugu apeqquteqaat aallaavigalugu oqallisissiatut siunnersuut.**

(Inatsisartunut ilaasortaq Hans Enoksen, Partii Naleraq)

(Apeqquteqaat aallaavigalugu oqallinneq)

Meeqqat suli atualinngitsut tamarmik perorsaanikkut inerikkiartuutaasumik ulluunerani paaqqinnittarfimmiittarnissaat tamatta kissaatigaarput. Soorlu Naalackersuisut eqqortumik tikkuaraat tamanna kommunit oqartussaaffigaat. Taamaakkaluartorli siunnersuuteqartup pineqartoq pillugu kommuninik oqaloqatiginninnissaminut nassarsinnaasaanik marlussunnguanik siunnersuuteqassaagut.

Demokraatini ilaatigut Perorsaanermik Ilinniartfik/Pædagogisk Seminarium kiisalu Peqqisaanermik Ilinniartfik nersualaarusuppagut naleqqussartuurtarmata, ineriartortitsimmata aamma pikkorissarnissanik ilinniarnernillu tulluurtunik neqerooruteqartarmata taamatullu perorsaanikkut peqqinnissakkullu ilinniarnernik nutaanik eqqarsartuurtarmata. Pissarsinarpoq kusanarlunilu nunatsinni sulisunik angusassanik toraagaqarlutik ilinniartitsisarnerat piginnaanngorsaasarneralu.

Meeqqat perorsaanikkut inerikkiartuutaasumik ulluunerani paarineqartarnissartik pisariaqartippaat, isumaqarpugulli aamma suliamut tamatumunnga atatillugu kalaallit kulturiata ilaatinnissaa pisariaqartoq. Meeqqat amerlasuut inunngornerminniit ukiut siulliit angerlarsimaffimmini paarineqartarput, ilaat atualernissartik tikillugu. Amerlasuut ilaquttaminnit, angajoqqaaminnit, aanaakkuminnit, illortaaminnit aamma angaakkuminnit paarineqartarput aamma pisortanit sualummik sumiiffinni mikisuni neqerooruteqartarput toqqorsivinnut assigunerusumik taamaattumik ilaquttat paarsisarnerat ajoriinnagassaangilaq.

Pisortat aamma pisariaqartippaat nunami maani ilaqutariinnut meerartalinnut attaveqarnissartik - sapinngisamik siusinnerpaamik, angajoqqaat ulorianartorsiortut imaluunniit ulorianartorsiulersinnaasut ikiorneqarsinnaaqqullugit aamma malinnaavigineqarsinnaaqqullugit meeqqap ukiuini siullerni pingaaruteqarluinnartuni, taamaattumik Demokraatini Naalackersuisunut inassutigissuarput eqimattat taakku pisortanut attaveqatigiinnerat attaveqarnerallu eqqumaffigeqqullugu.



Demokraatini tamatuma saniatigut takorloorsinnaakuttoorparput illoqarfinni minnerni aamma nunaqarfinni angajoqqaanut, anaanangorlaanut ataatanngorlaanullu neqeroorutigineqarsinnaasoq meeqqaminnut mikisunut paarseqataajortortaqqullugit. Tassa angajoqqaat meeqqerivinni ikiuuttassasut, meeqqatik peqatigalugit taamaasillutillu sumiiffinnik ineriartortitseqataallutik, meeqqerinnullu imaluunniit paaqqinnittarfinnut isumassanik tunioraasarlutik meeqqatillu ikorfartorlugit. Tamanna sualummik illoqarfinni minnerni isumaqarluarpoq.

Angajoqqaat taamaasillutik erninermut atatillugu sulinngiffeqarnerminni meeqqanut avissaariartuaarnissartik aallartisarsinnaavaat - meeqqallu ulluinnarni inuuneranut peqataallutik naalugiarsuit iperavinninneranni aamma meeqqeriviit taamaasillutik aallaqqaataaniik angajoqqaanik kusanartumik suleqateqarneq aallartissinnaassagaluarpaat.

Nassuerutigisariaqarparput inuit pinngitsaalisinnaannginnatsigit perorsaasutut ilinniaqqullugit, kisianni ilinniarnarit, pikkorissarnerit piginnaanngorsarnerillu nunami sumiluunniit ajornannginnerulersitsuugutsigit, taava periarfissarissaarnerulissaaq angorusutatta angunissaa aammali pisariaqarpoq piffissaq sivisunerusoq isigalugu kommunit pilersaarusiornissaat angusassallu pillugit pilersaarusiornissaat. Suliarli tamanna aallarereerpoq.

Demokraatini ilungersuutigaarput sulisut ilinniartinnerisa sakkortusarnissaat - aamma ilinniarsimangitsut akornanni, nunaqarfinni tamani, perorsaanikkut ineriartortuutaasumik ulluunerani neqerooruteqartarnissap, ilinniartitaanerup, piginnaanngorsaanerullu suliarinerani sumiginnaasoqartarnera, paarsinerluttoqartarneralu pillugit nalunaaruteqartarnissaq eqqarsaatigalugu.

Pingaaruteqarluinnaqqissaarpoq meerannguit mikisut inuunerat pisinnaatitaaffiilu innarlerneqarpata malugineqapallartarnissaat aamma nalunaaruteqartoqareerneratigut ilaqquttat, meeraq meeqqalluunniit erngiinnaq iliuuseqarfigisarnissaat. Nunami maani meerartagut pisuussutitta annersaraat.

Aamma suliami tassani eqqaasitsissutigissuarput nunami maani utoqqartagut misilittagarpassuaqarmata immaqalu taamaattumik aamma soorlu Nunavutimisut, inuiaqatigiinni eqqissisaasutut naleqqussaaqataasutullu suleqataasinnaammata sualummik meeqqat inuusuttullu eqqarsaatigalugit.

Naggataatigut minnerunngitsumillu tikkuassuarput meeqqat suli atualinngitsut sullinnerat aamma imaqartariaqarmat kulturitsinneersunik, pinngortitameersunik aamma perorsaanermeersunik.



Taamatulli oqareerluta aamma nalunngilarput pisumi nutaamik eqqarsartariaqaratta nunami meeqqeriviit ilaanni meeqqat ikittunnguusarmata taamaattumik tupinnanngitsumik meeqqerivinni taakkunani piginnaaneqarluartunik amerlasuunik peqarneq ajorpoq sumiiffinnut anginernut naleqqiullugu.

Neriuppugut qarasaasiakkut neqeroorutit amerlanerit, pikkorissarnerit aamma piginnaanngorsaqqinnerit periarfissaalerumaartut nunami maani meeqqat tamarmik perorsaanikkut inerikkiartuutaasumik ulluunerani paaqqinnittarfimmiittarnissaat angujumallugu.

Immikkoortup kommuninit oqartussaaffigineqarnera pissutigalugu inassutigaarput Inatsisartut oqaaseqaateqarnissaanut siunnersuut itigartinneqassasoq.

Qujanaq oqaaseqarsinnaagama.